



4. november 2015

UK2015/49

Ilinniartut Kalaallit Nunaata avataani ilinniartut naammassereerermik kingorna ukiut qulit angullugit Kalaallit Nunaannut uteqqittannginnerat kiisalu ilinniartut naammassereerlutik Kalaallit Nunaannut uteqqikkumasanninnerannut pissutaasut pillugit misissuinissamut aallartitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup kinguneranik uterartitsinissaq pillugu iliuusissamik pilersarusiortoqassaaq, kalaallit ilinniartut naammassereerlutik Kalaallit Nunaannut uteqqittarnissaminnut kajumissuseqalernissaannut kammattuutaasussamik.

(Demokraatit gruppe-at)

Atassut siunnersuuteqartunut pingaarutilimmik siunnersuuteqarnerannut qujarusuppoq. Siunnersuummi anguniarneqarpoq, misissutitsinissamik aammalu uterartitsinissaq anguniarlugu iliuusissamik pilersitsitseqqunermillu Naalakkersuisut suliakkerneqassasut.

Innuttaasut atugarissaarnissaat pitsanngorsassagutiguk ilinniartitaanerup aqqutiginnissaa pingaaruteqarpoq.

Innuttaasut ilianniagaqartut tamaasa aamma nunatta avataanut ilinniariartartut nunatta siunissarai aamma pisariaqartippai.

Ilinniagaqarumalluni aaliangersimagaanni amerlasuutigut nunatta avataanut ilinniariartariaqarnermik malitseqartarpoq, nunatsinni ilinniarfiit killeqarmata.

Innuttaasut nunatta avataanut ilinniariartariaqartut nunatsinnut uterusulernissaat angussagutsiguk, taakku ilinniarnerminni nunatsinni najugaqartut assigalugit pisinnaatitaaffeqarnerat inissisimasariaqarpoq.

Peqataatitsineq.

Atassut isumaqarpoq innuttaasut nunatta avataanut ilinniariarsimasut aallaqqanerminni sutigut tamatigut peqataatinneqarnissaaq pingaaruteqarluinnartoq.

Assersuutigalugu innuttaasut nunatta avataanut ilinniariaraangamik, nunatsinni initaarniarnerminni imaluunniit meeqqaanut paaqqinnittarfiinut utaqqisutut allattorsimanertik aallaraangamik annaasarpaat.

Taamaalilluni innuttaasut nunatta avataanut ilinniariareersimallutik nunatsinnut uteraangamik utaqqisut allattorsimaffiannut kingullersatut inissittarput. Tamannalu nunatta avataanut ilinniariarsimasut uterniaraluarlutik ilaatigut aporfigisarpaat.

Allatut oqaatigalugu, innuttaasutut peqataatitaaneq nunatta avataanut ilinniariartut annaasarpaat, taamaalillutik nunami allami atugassarititaasut sungiussimalersimasatik toqqissisimanarisatillu qimakkuminaatsilersarpaat. Tamanna paasinarpoq aamma assertoruminaappoq.

Atassut isumaqarpoq, innuttaasut nunatta avataaanut ilinniariartortut peqataatitaanerit annertusarneqartariaqartoq, tamannalu qulaani assersuutitut taariikkakka initaarnissamut aammalu meeqqat paaqqinnittarfiinut utaqqisunut allattorsimaffiinut allaqqasarneq avalannermi annaaneqartarunnaarsinneratigut aammalu avalaqqagaluarluni utaqqisut allattorsimaffiinut ilanngussinnaaneq periarfissanngortinneqartariaqarput.

Atassut misissuititsinissaq aammalu ilinniartunik uterartitsinissaq anguniarlugu iliuusissanik pilersaarusiortoqarnissaa isumaqataaffigaa. Taamatut oqaaseqarluta siunnersuut tamakkiisumik isumaqataalluta taaseqataaffigissavarput.